



Oliy ta'lim, fan va innovatsiyalar vazirining
2023-yil "13" yanvardagi
4 -son buyrug'iga 1-ilova

“Kitobxon yoshlar” onlayn respublika tanlovini o‘tkazish tartibi to‘g‘risidagi NIZOM

I. Umumiy qoidalar

1.1. Mazkur nizom talaba-yoshlar orasida kitobxonlikni keng ommalashtirish, “Kitobsevar millat” umummilliy g‘oyasini ro‘yobga chiqarish”, shuningdek, talaba-yoshlarning darslardan bo‘sh vaqtlarini mazmunli tashkil etish maqsadida 2023-yilning yanvar oyida **“Kitobxon yoshlar”** onlayn respublika tanlovi (keyingi o‘rinlarda – Tanlov)ni tashkil etish va o‘tkazish tartibini belgilaydi.

1.2. O‘zbekiston Respublikasi Prezidentining yoshlar ma‘naviyatini yuksaltirish va ularning bo‘sh vaqtlarini mazmunli tashkil etish bo‘yicha 5 muhim tashabbusining to‘rtinchi tashabbusi “Yoshlar ma‘naviyati yuksaltirish, ular o‘rtasida kitobxonlikni keng targ‘ib qilish bo‘yicha tizimli ishlarni tashkil etish” hamda 2022-2026-yillarga mo‘ljallangan Taraqqiyot strategiyasi V bob, 72-maqsadi: “Aholiga axborot-kutubxona xizmatini ko‘rsatishni yanada rivojlantirish, kitobxonlikni keng ommalashtirish, “Kitobsevar millat” umummilliy g‘oyasini ro‘yobga chiqarish” maqsadida tashkil etiladi.

II. Tanlovning maqsadi va vazifalari

2.1. Tanlovni o‘tkazishdan maqsad talabalar orasida kitobxonlik madaniyatini yuksaltirish va kitob mutolaasini keng targ‘ib qilishdan iborat.

2.2. Tanlovning asosiy vazifasi talaba-yoshlarning kitob o‘qishga bo‘lgan qiziqishlarini yanada oshirish, aholi hamda yoshlarning dunyoqarashi, so‘z boyligini kengaytirish, ijtimoiy faolligi va millat taqdiriga daxldorligini oshirish, kitobxonlik madaniyati, savodxonligini rivojlantirish, yoshlarni vatanparvarlik ruhida tarbiyalashdan iborat.

III. Tanlovni o‘tkazish bosqichi va muddatlari

3.1. Tanlov (*tashkilotchi*) vazirlik huzuridagi Talaba va o‘quvchilarning ma‘naviy yuksalishiga ko‘maklashish markazi tomonidan tashkil etiladi.

3.2. Tanlovda davlat oliy ta‘lim muassasalarida tahsil olayotgan talaba-yoshlar jumladan, bakalavr va magistrlar ishtirok etishlari mumkin.

3.3. Mazkur tanlov yakka tartibdagi musobaqa bo‘lib, unda qatnashish uchun ishtirokchilar telegramdagi maxsus [@kitobtanlovbot](#) orqali belgilangan tartibda ro‘yxatdan o‘tishlari va bot taqdim qiladigan maxsus referalni ulashish orqali tanlov targ‘ibotida qatnashib, kamida +5 referal ball yig‘ishlari kerak bo‘ladi.

3.4. Tanlovda ishtirokchilarga, oldindan 2 ta kitob o'qish uchun vazifa qilib beriladi. Kitoblarni o'qish uchun tanlov e'lon qilingan kundan boshlab 10 kun vaqt beriladi.

Belgilangan vaqt yakunlangach, 5 kun davomida har kuni 30 tadan (jami 150 ta) vazifa qilib berilgan kitoblar asosida tuzilgan test savollari [@kitobtanlovbot](#) manzilida berib boriladi. Har bir test savolini ishlash uchun 1 daqiqa vaqt beriladi va yakundan eng ko'p ball to'plagan ishtirokchilar tanlov g'olibi deb topiladi.

3.5. Yakuniy natijalarga ko'ra yuqori o'rinlarni egallagan ishtirokchilarning ballari teng bo'lib qolgan taqdirda, o'sha ishtirokchilar o'rtasida qo'shimcha bellashuv tashkil etiladi va ushbu bellashuvda g'olib bo'lgan ishtirokchi yuqoriroq o'rinda deb hisoblanadi.

3.6. Vazifa sifatida beriladigan kitoblar ro'yxati:

- 1) Fyodor Dostoyevskiyning "Jinoyat va jazo" asari;
- 2) Pirimqul Qodirovning "Yulduzli tunlar" asari.

3.7. Bundan tashqari tanlov e'lon qilingan kundan yakuniga qadar bo'lgan muddatda tanlov targ'ibotida faol ishtirok etib, eng yuqori referal ball to'plagan 10 nafar ishtirokchilar "Eng faol tanlov targ'ibotchisi" nominatsiyasi g'olibi deb topiladi.

IV. Tanlov g'oliblarini taqdirlash

4.1. Tanlov g'olib va sovrindorlar hamda tashkilotchilari Oliy ta'lim, fan va innovatsiyalar vazirligining oliy ta'lim muassasalarini rivojlantirish jamg'armasi mablag'lari hisobidan quyidagi tartibda:

1-o'rin 1 nafar – 5 000 000,

2-o'rin 2 nafar – 4 000 000,

3-o'rin 3 nafar – 3 000 000,

4-o'rin 4 nafar – 2 000 000,

5-o'rin 10 nafar – 1 000 000 hamda "Eng faol tanlov targ'ibotchisi" nominatsiyasi g'oliblari 10 nafar - 1 000 000 so'm pul mukofotlari bilan taqdirlanadi.

V. Yakuniy qoidalar

5.1. Tanlov davomida (taqdirlash marosimida) tashkilotchilar ishtirokchining shaxsini tasdiqlovchi hujjatini ko'rsatishini (onlayn yuborishini) talab qilishi mumkin.

5.2. Tanlov davomida ikki yoki undan ko'p profillar orqali ishtirok etish yoki nizomni buzish holatlari aniqlansa, o'sha ishtirokchining natijasi bekor qilinadi va o'zi tanlovdan chetlashtiriladi.

5.3. Tanlov ishtirokchilari (boshqa shaxslar) tomonidan tanlovni tashkil etish va o'tkazish, shuningdek, uning natijasi bilan bog'liq murojaat (e'tiroz)lar qabul qilinmaydi.

5.4. Tanlovda g'oliblikni qo'lga kiritgan talabalar, taqdirlash marosimi tashkil etilganda kelib-ketish va mehmonxona xarajatlari oliy ta'lim muassasasi tomonidan qoplab beriladi.